

百喻經卷上

蕭齊天竺三藏求那毗地譯

群一

聞如是一時佛住王舍城在鵲封竹園與諸
大比丘菩薩摩訶薩及諸八部三萬六千人
俱是時會中有異學梵志五百人俱從座而
起白佛言吾聞佛道洪深無能及者故來歸
問唯願說之佛言甚善問曰天下爲有爲無
答曰亦有亦無梵志曰如今有者云何言無
如今無者云何言有答曰生者言有死者言
無故說或有或無問曰人從何生答曰人從

穀而生問曰五穀從何而生答曰五穀從四
大火風而生問曰四大火風從何而生答曰
四大火風從空而生問曰空從何生答曰從
無所有生問曰無所有從何而生答曰從自
然生問曰自然從何而生答曰從泥洹而生
問曰泥洹從何而生佛言汝今問事何以爾
深泥洹者是不生不死法問曰佛泥洹未答
曰我未泥洹若未泥洹云何得知泥洹常樂
佛言我今問汝天下衆生爲苦爲樂答曰衆
生甚苦佛言云何名苦答曰我見衆生死時

苦痛難忍故知死苦佛言汝今不死亦知死
苦我見十方諸佛不生不死故知泥洹常樂
五百梵志心開意解求受五戒悟須陀洹果
復坐如故佛言汝等善聽今為汝廣說衆喻
愚人食鹽喻 愚人集牛乳喻 以犁打破
頭喻 婦詐語稱死喻 渴見水喻 子死
欲停置家中喻 認人為兄喻 山羌偷官
庫喻 歎父德行喻 三重樓喻 婆羅門
殺子喻 煮黑石蜜漿喻 說人喜瞋喻
殺商主祀天喻 醫與王女藥令卒長大喻

灌甘蔗喻 債半錢喻 就樓磨刀喻
乘船失孟喻 人說王所縱暴喻 婦女欲
更求子喻 入海取沉水喻 賊偷錦繡用
裹氈髡喻 種熬胡麻子喻 水火喻 人
效王眼瞞喻 治鞭瘡喻 為婦買鼻喻
貧人燒麤褐衣喻 牧羊人喻 雇倩瓦師
喻 估客偷金喻 斫樹取果喻 送美水
喻 寶篋鏡喻 破五通仙眼喻 殺群牛
喻 飲木甬水喻 見他塗舍喻 治禿喻
毗舍闍鬼喻 佑客駝死喻 磨大石喻

食半餅喻 奴守門喻 偷犂牛喻 貧

人能作鴛鴦鳴喻 野干為折樹枝所打喻

小兒爭分別毛喻 醫治脊僂喻

愚人食鹽喻

昔有愚人至於他家人與食嫌淡無味主人聞已更為益鹽既得鹽美便自念言所以美者緣有鹽故少有尚爾況復多也愚人無智便空食鹽食已口爽反為其患譬彼外道聞節飲食可以得道即便斷食或經七日或十五日徒自困餓無益於道如彼愚人以鹽

美故而空食之致令口爽此亦復爾

愚人集牛乳喻

昔有愚人將會賓客欲集牛乳以俟供設而作是念我今若預於日日中犂取牛乳牛乳漸多都無安處或復酢敗不如即就牛腹盛之待臨會時當頓犂取作此念已便捉犂牛母子各繫異處却後一月爾乃設會延置賓客方牽牛來欲犂乳取而此牛乳即乾無有時為眾賓或瞋或笑愚人亦爾欲修布施方言待我大有之時然後頓施未及聚頃或為

縣官水火盜賊之所侵奪或卒命終不及時
施彼亦如此

以黎打破頭喻^三

昔有愚人頭上無毛時有一人以黎打頭乃
至二三悉皆傷破時此愚人默然忍受不知
避去傍人見已而語之言何不避去乃住受
打致使頭破愚人答言如彼人者憍慢恃力
癡無智慧見我頭上無有髮毛謂爲是石以
黎打我頭破乃爾傍人語言汝自愚癡云何
名彼以爲癡也汝若不癡爲他所打乃至頭

破不知逃避比丘亦爾不能具修信戒聞慧
但整威儀以招利養如彼愚人被他打頭不
知避去乃至傷破反謂他癡此比丘者亦復
如是

婦詐語稱死喻^四

昔有愚人其婦端正情甚愛重婦無貞信後
於中間共他交往邪姪心盛欲就傍夫拾離
已壻於是密語一老母言我去之後汝可齎
一死婦女屍安著屋中語我夫言云我已死
老母於後伺其夫主不在之時以一死屍置

其家中及其夫還老母語言汝婦已死夫即
往視信是已婦哀哭懊惱大藉薪油燒取其
骨以囊盛之晝夜懷挾婦於後時心厭傍夫
便還歸家語其夫言我是汝妻夫答之言我
婦久死汝是阿誰妄言我婦乃至二三猶故
不信如彼外道釋一聞他邪說心生惑著謂為真
實永不可改雖聞正教不信受持

渴見水喻

王

過去有人癡無智慧極渴須水見熱時飲謂
為是水即便逐走至新頭河既至河所對視

不飲傍人語言汝患渴逐水今至水所何故
不飲愚人答言若可飲盡我當飲之此水極
多俱不可盡是故不飲爾時衆人聞其此語
皆大嗤笑譬如外道僻取於理以已不能具
持佛戒遂便不受致使將來無得道分流轉
生死若彼愚人見水不飲為時人笑亦復如
是

子死欲停置家中喻

六

昔有愚人養育七子一子先死時此愚人見
子既死便欲停置於其家中自欲棄去傍人

見已而語之言生死道異當速莊嚴致於遠處而殯葬之云何得留自欲棄去爾時愚人聞此語已即自思念若不得留要當葬者須更殺一子停擔兩頭乃可勝致於是便更殺其一子而擔負之遠葬林野時人見之深生嗤笑怪未曾有譬如比丘私犯一戒情憚改悔默然覆藏自說清淨或有智者即語之曰出家之人守持禁戒如護明珠不使缺落汝今云何違犯所受欲不懺悔犯戒者言苟須懺者更就犯之然後當出遂便破戒多作不

善爾乃頓出如彼愚人一子既死又殺一子今此比丘亦復如是

認人爲兄喻^七

昔有一人形容端正智慧具足復多錢財舉世人間無不稱美時有愚人見其如此便言我兄所以爾者彼有錢財須者則用之是故爲兄見其還債言非我兄傍人語言汝是愚人云何須財名他爲兄及負債時復言非兄愚人答言我以欲得彼之錢財認之爲兄實非是兄若其負債則稱非兄人聞此語無不

笑之猶彼外道聞佛善語盜竊而用以爲己
有乃至傍人教使修行不肯修行而作是言
爲利養故取彼佛語化導衆生而無實事云
何修行猶向愚人爲得財故言是我兄及負
債時復言非兄此亦如是

山羌偷官庫衣喻八

過去之世有一山羌偷王庫物而遠逃走爾
時國王遣人四出推尋捕得將至王邊王即
責其所得衣處山羌答言我衣乃是祖父之
物王遣著衣實非山羌本所有故不知著之

應在手者著於脚上應在腰者反著頭上王
見賊已集諸臣等共詳此事而語之言若是
汝之祖父已來所有衣者應當解著云何顛
倒用上爲下以不解故定知汝衣必是偷得
非汝舊物借以爲譬王者如佛寶藏如法愚
癡羌者猶如外道竊聽佛法著已法中六以爲
自有然不解故布置佛法迷亂上下不知法
相如彼山羌得王寶衣不識次第顛倒而著
亦復如是

歎父德行喻九

昔時有人於衆人中歎己父德而作是言我父慈仁不害不盜直作實語兼行布施時有愚人聞其此語便作是言我父德行復過汝父諸人問言有何德行請道其事愚人答曰我父小來斷絕婬欲初無染汙衆人語言若斷婬欲云何生汝深爲時人之所怪笑猶如世間無知之流欲讚人德不識其實反致毀訾如彼愚者意存歎父言成過失此亦如是三重樓喻^十

往昔之世有富愚人癡無所知到餘富家見

三重樓高廣嚴麗軒敞踈朗心生渴仰即作是念我有財錢不減於彼云何頃來而不造作如是之樓即喚木匠而問言曰解作彼家端嚴舍不木匠答言是我所作即便語言今可爲我造樓如彼是時木匠即便經地壘塹作樓愚人見其壘塹^{十一}作舍猶懷疑惑不能了知而問之言欲作何等木匠答言作三重屋愚人復言我不欲下二重之屋先可爲我作最上屋木匠答言無有是事何有不作最下重屋而得造彼第二之屋不造第二云何得

造第三重屋愚人固言我今不用下二重屋
必可爲我作最上者時人聞已便生怪笑咸
作此言何有不造下第一屋而得上者譬如
世尊四輩弟子不能精勤修敬三寶嬾惰懈
怠欲求道果而作是言我今不用餘下三果
唯欲得彼阿羅漢道亦爲時人之所嗤笑如
彼愚者等無有異

婆羅門殺子喻

十一

昔有婆羅門自謂多知於諸星術種種技藝
無不明達恃已如此欲顯其德遂至他國抱

兒而哭有人問婆羅門言汝何故哭婆羅門
言今此小兒七日當死愍其夭殤以是哭耳
時人語言人命難知計筭喜錯設七日頭或
能不死何爲預哭婆羅門言日月可闔星宿
可落我之所記終無違失爲名利故至七日
頭自殺其子以證已說時諸世人却後七日
聞其兒死咸皆歎言真是智者所言不錯心
生信伏悉來致敬猶如佛之四輩弟子爲利
養故自稱得道有愚人法殺善法子詐現義
德故使將來受苦無窮如婆羅門爲驗已言

殺子惑世

煮黑石蜜漿喻 十二

昔有愚人煮黑石蜜有一富人來至其家時此愚人便作是念我今當取黑石蜜漿與此富人即著少水用置火中即於火上以扇扇之望得使冷傍人語言下不止火扇之不已云何得冷爾時衆人悉皆嗤笑其猶外道不滅煩惱熾然之火少作苦行卧棘刺上五熱炙身而望清涼寂靜之道終無是處徒爲智者之所怪哂受苦現在殃流來劫

說人喜瞋喻 十三

過去有人共多人衆坐於屋中歎一外人德行極好唯有二過一者喜瞋二者作事倉卒爾時此人遇在門外聞作是語便生瞋恚即入其屋擒彼道已過惡之人以手打撲傍人問言何故打也其人答言我曾何時喜瞋倉卒而此人者道我恒喜瞋恚作事倉卒是故打之傍人語言汝今喜瞋倉卒之相即時現驗云何諱之人說過惡而起怨責深爲衆人怪其愚惑譬如世間飲酒之夫耽荒酗酒作

諸放逸見人訶責反生尤嫉苦引證佐用自明白若此愚人諱聞已過見他道說反欲打撲

殺商主祀天喻 十四

昔有賈客欲入大海入大海之法要須導師

釋一

九

然後可去即共求覓得一導師既得之已相將發引至曠野中有一天祠當須人祀然後得過於是衆賈共思量言我等伴黨盡是親屬如何可殺唯此導師中用祀天即殺導師以用祭祀祀天已竟迷失道路不知所趣窮

困死盡一切世人亦復如是欲入法海取其珍寶當須善行以爲導師毀破善行生死曠路永無出期經歷三塗受苦長遠如彼商賈將入大海殺其導者迷失津濟終至困死

醫與王女藥令卒長大喻 十五

昔有國王產生一女喚醫語言爲我與藥立使長大醫師答言我與良藥能使即大但今卒無方須求索比得藥頃王要莫看待與藥已然後示王於是即便遠方取藥經十二年得藥來還與女令服將示於王王見歡喜即

自念言實是良醫與我女藥能令卒長便勅
左右賜以珍寶時諸人等笑王無智不曉籌
量生來年月見其長大謂是藥力世人亦爾
詣善知識而啓之言我欲求道願見教授使
我立得善知識師以方便故教令坐禪觀十
二緣起漸積衆德獲阿羅漢位踊躍歡喜而
作是言快哉大師速令我等證最妙法

灌甘蔗喻

十六

昔有二人共種甘蔗而作誓言種好者賞其
不好者當重罰之時二人中一者念言甘蔗

極甜若壓取汁還灌甘蔗樹甘美必甚得勝
於彼即壓甘蔗取汁用溉冀望滋味反敗種
子所有甘蔗一切都失世人亦爾欲求善福
恃已豪貴專形挾勢迫脅下民陵奪財物以
用作福本期善果不知將來反獲其殃如壓
甘蔗彼此都失

債半錢喻

十七

往有商人貸他半錢久不得償即便往債前
有大河崔他兩錢然後得度到彼往債竟不
得見來還度河復度兩錢爲半錢債而失四

錢兼有道路疲勞乏困所債甚少所失甚多
果被衆人之所怪笑世人亦爾要少名利致
毀大行苟容己身不顧禮儀現受惡名後得
苦報

就樓磨刀喻 十八

昔有一人貧窮困苦爲王作事日月經久身
體羸瘦王見憐愍賜一死駝貧人得已即便
剥皮嫌刀鈍故求石欲磨乃於樓上得一磨
石磨刀令利來下而剥如是數數往來磨刀
後轉勞苦憚不能數上懸駝上樓就石磨刀

深爲衆人之所嗤笑猶如愚人毀破禁戒多
聚錢財以用修福望得生天如懸駝上樓
磨刀用功甚多所得甚少

乘船失孟喻 十九

昔有人乘船度海失一銀盂墮於水中即便
思念我今畫水作記捨之而去後當取之行
經二月到師子諸國見一河水便入其中覓
本失盂諸人問言欲何所作答言我先失盂
今欲覓取問言於何處失答言初入海失又
復問言失經幾時言失來二月問言失來二

月云何此覓答言我失孟時畫水作記本所
畫水與此無異是故覓之又復問言水雖不
別汝昔失時乃在於彼今在此覓何由可得
爾時衆人無不大笑亦如外道不修正行相
似善中橫計苦因以求解脫猶如愚人失孟
於彼而於此覓

人說王所縱暴喻 二十

昔有一人說王過罪而作是言王甚暴虐治
政無理王聞是語即大瞋恚竟不究悉誰作
此語信傍佞人捉一賢臣仰使剥脊取百兩

肉有人證明此無是語王心便悔索千兩肉
用爲補脊夜中呻喚甚大苦惱王聞其聲問
言何以苦惱取汝百兩十倍與汝意不足耶
何故苦惱傍人答言大王如截子頭雖得千
頭不免子死雖十倍得肉不免苦痛愚人亦
爾不畏後世貪得現樂苦切衆生調發百姓
多得財物望得滅罪而得福報譬如彼王剥
人之脊取人之肉以餘肉補望使不痛無有
是處

婦女欲更求子喻 二十一

往昔世時有婦女人始有一子更欲求子問
餘婦女誰有能使我重有子有一老母語此
婦言我能使爾求子可得當須祀天問老母
言祀須何物老母語言殺汝之子取血祀天
必得多子時此婦女便隨彼語欲殺其子傍
有智人嗤笑罵詈愚癡無智乃至如此未生
子者竟可得而不殺現子愚人亦爾爲生天
故自投火坑種種害身爲得生天
入海取沉水喻 二十二

車持來歸家詣市賣之以其貴故卒無買者
經歷多日不能得售心生疲厭以爲苦惱見
人賣炭時得速售便生念言不如燒之作炭
可得速售即燒爲炭詣市賣之不得半車炭
之價直世間愚人亦復如是無量方便勤行
精進仰求佛果以其難得便生退心不如發
心求聲聞果速斷生死作阿羅漢
賊偷錦繡用裹氈毼喻 二十三

昔有賊人入富家舍偷得錦繡即持用裹故
弊氈毼種種財物爲智人所笑世間愚人亦

復如是既有信心入佛法中修行善法及諸功德以貪利故破於清淨戒及諸功德為世所笑亦復如是

種熬胡麻子喻

二十四

昔有愚人生食胡麻子以為不美熬而食之

為美便生念言

群一

不如熬而種之後得美者便

十三

熬而種之永無生理世人亦爾以菩薩曠劫修行因難行苦行以為不樂便作念言不如作阿羅漢速斷生死其功甚易後欲求佛果終不可得如彼焦種無復生理世間愚人亦

復如是

水火喻

二十五

昔有一人事須火用及以冷水即便宿火以澡盥盛水置於火上後欲取火而火都滅欲取冷水而水復熱火及冷水二事俱失世間之人亦復如是入佛法中出家求道既得出家還復念其妻子眷屬世間之事五欲之樂由是之故失其功德之火持戒之水念欲之人亦復如是

人效王眼瞞喻

二十六

昔有一人欲得王意問餘人言云何得之有人語言若欲得王意者王之形相汝當效之此人即便往至王所見王眼瞞便效王瞞王問之言汝爲病耶爲著風耶何以眼瞞其人答王我不病眼亦不著風欲得王意見王眼瞞故效王也王聞是語即大瞋恚即便使人種種加苦擯令出國世人亦爾於佛法王欲得親近求其善法以自增長旣得親近不解如來法王爲衆生故種種方便現其闕短或聞其法見有字句不正便生譏毀效其不是

由是之故於佛法中永失其善墮於三惡如彼愚人亦復如是

治鞭瘡喻 二十七

昔有一人爲王所鞭旣被鞭已以馬屎傳之欲令速差有愚人見之心生歡喜便作是言我使得是治瘡方法即便歸家語其兒言汝鞭我背我得好法今欲試之兒爲鞭背以馬屎傳之以爲善巧世人亦爾聞有人言修不淨觀即得除去五陰身瘡便作是言我欲觀於女色及以五欲未見不淨反爲女色之所

惑亂流轉生死墮於地獄世間愚人亦復如是

爲婦買鼻喻 二十八

昔有一人其婦端正唯其鼻醜其人出外見他婦女面貌端正其鼻甚好便作念言我今寧可截取其鼻著我婦面上不亦好乎即截他婦鼻持來歸家急喚其婦汝速出來與汝好鼻其婦出來即割其鼻尋以他鼻著婦面上既不相著復失其鼻唐使其婦受大苦痛世間愚人亦復如是聞他宿舊沙門婆羅門

有大名德而爲世人之所恭敬得大利養便作是念言我今與彼便爲不異虛自假稱妄言有德既失其利有傷其行如截他鼻徒自傷損世間愚人亦復如是

貧人燒麤褐衣喻 二十九

昔有一人貧窮困乏與他客作得麤褐衣而彼著之有人見之而語之言汝種姓端正貴人之子云何著此麤弊衣褐我今教汝當使汝得上妙衣服當隨我語終不欺汝貧人歡喜敬從其言主人即便在前然火語貧人言

今可脫汝羸褐衣著於火中於此燒處當使汝得上妙欽服貧人即便脫著火中既燒之後於此火處求覓欽服都無所得世間之人亦復如是從過去身修諸善法得此人身應當保護進德修業乃爲外道邪惡妖女之所欺誑汝今當信我語修諸苦行投巖赴火捨是身已當生梵天長壽快樂便用其語即捨身命身死之後墮於地獄備受諸苦既失人身空無所獲如彼貧人亦復如是

牧羊人喻

三十

昔有一人巧於牧羊其羊滋多乃有千萬極大慳貪不肯外用時有一人善於巧詐便作方便往共親友而語之言我今共汝極成親愛便爲一體更無有異我知彼家有一好女當爲汝求可用爲婦牧羊之人聞之歡喜便大與羊及諸財物其人復言汝婦今日已生一子牧羊之人未見於婦聞其已生心大歡喜重與彼物其人後復而語之言汝兒生已今已死矣牧羊之人聞此人語便大啼泣噓歎不已世間之人亦復如是既修多聞爲其

名利秘惜其法不肯為人教化演說為此漏身之所誑惑妄期世樂如已妻息為其所欺喪失善法後失身命并及財物便大悲泣生其憂苦如彼牧羊之人亦復如是

雇倩瓦師喻 三十一

十一

十六

昔有婆羅門師欲作大會語弟子言我須瓦器以供會用汝可為我雇倩瓦師詣市覓之時彼弟子往瓦師家時有一人驢負瓦器至市欲賣須臾之間驢盡破之還來家中啼哭懊惱弟子見已而問之言何以悲歎懊惱如

是其人答言我為方便勤苦積年始得成器詣市欲賣此弊惡驢須臾之頃盡破我器是故懊惱爾時弟子見聞是已歡喜念言此驢乃是狂物久時所作須臾能破我今當買此驢瓦師歡喜即便賣與乘來歸家師問之言汝何以不得瓦師將來用是驢為弟子答言此驢勝於瓦師瓦師久時所作瓦器少時能破時師語言汝大愚癡無有智慧此驢今者適可能破假使百年不能成一世間之人亦復如是雖百年受人供養都無報償常為損

害終不爲益背恩之人亦復如是

估客偷金喻 三十二

昔有二估客共行商賈一賣真金其第二者賣兒羅綿有他買真金者燒而試之第二估客即便偷他被燒之金用兒羅綿裹時金熱故燒綿都盡情事既露二事俱失如彼外道偷取佛法著己法中妄稱己有非是佛法由是之故燒滅外典不行於世如彼偷金事情都現亦復如是

斫樹取果喻 三十三

昔有國王有一好樹高廣極大常有好果香而甜美時有一人來至王所王語之言此之樹上將生美果汝能食不即答王言此樹高廣雖欲食之何由能得即便斷樹望得其果既無所獲徒自勞苦後還欲堅樹已枯死都無生理世間之人亦復如是如來法王有持戒樹能生勝果心生願樂欲得果食應當持戒修諸功德不解方便反毀其禁如彼伐樹復欲還活都不可得破戒之人亦復如是

送美水喻 三十四

昔有一聚落去王城五由旬村中有好美水
王勅村人常使日日送其美水村人疲苦悉
欲移避遠此村去時彼村主語諸人言汝等
莫去我當爲汝白王改五由旬作三由旬使
汝得近往來不疲即往白王王爲改之作三
由旬衆人聞已便大歡喜有人語言此故是
本五由旬更無有異雖聞此言信王語故終
不肯捨世間之人亦復如是修行正法度於
五道向涅槃城心生厭倦便欲捨離頓駕生
死不能復進如來法王有大方便於一乘法

分別說三小乘之人聞之歡喜以爲易行修
善進德求度生死後聞人說無有三乘故是
一道以信佛語終不肯捨如彼村人亦復如
是

寶篋鏡喻 三十五

群一

昔有一人貧窮困乏多負人債無以可償即
便逃避至空曠處值篋滿中珍寶有一明鏡
著珍寶上以蓋覆之貧人見已心大歡喜即
便發之見鏡中人便生驚怖叉手語言我謂
空篋都無所有不知有君在此篋中莫見瞋

也凡夫之人亦復如是爲無量煩惱之所窮困而爲生死魔王債主之所纏著欲避生死入佛法中修行善法作諸功德如值寶篋爲身見鏡之所惑亂妄見有我即便封著謂是真實於是墮落失諸功德禪定道品無漏諸善三乘道果一切都失如彼愚人棄於寶篋著我見者亦復如是

破五通仙眼喻

三十六

昔有一人入山學道得五通仙天眼徹視能見地中一切伏藏種種珍寶國王聞之心大

歡喜便語臣言云何得使此人常在我國不餘處去使我藏中得多珍寶有一愚臣輒便往至挑仙人雙眼持來白王臣以挑眼更不得去常住是國王語臣言所以貪得仙人住者能見地中一切伏藏汝今毀眼何所復住世間之人亦復如是見他頭陀苦行山林曠野塚間樹下修四意止及不淨觀便強將來於其家中種種供養毀他善法使道果不成喪其道眼已失其利空無所獲如彼愚臣唐毀他目也

群一

十九

殺群牛喻 三十七

昔有一人有二百五十頭牛常驅逐水草隨時餒食時有一虎噉食一牛爾時牛主即作念言已失一牛俱不全足用是牛爲即便驅至深坑高岸排著坑底盡皆殺之凡夫愚人亦復如是受持如來具足之戒若犯一戒不生慚愧清淨懺悔便作念言我以破一戒歸不具足何用持爲一切都破無一在者如彼愚人盡殺群牛無一在者

飲木甯水喻 三十八

昔有一人行來渴乏見木甯中有清淨流水就而飲之飲水已足即便舉手語木甯言我已飲竟水莫復來雖作是語水流如故便瞋恚言我已飲竟語汝莫來何以故來有人見之言汝大愚癡無有智慧汝何以不去語言莫來即爲挽却牽餘處去世間之人亦復如是爲生死渴愛飲五欲鹹水旣爲五欲之所疲厭如彼飲足便作是言汝色聲香味莫復更來使我見也然此五欲相續不斷旣見之已便復瞋恚語汝速滅莫復更生何以故來

使我見之時有智人而語之言汝欲得離者
當攝汝六情閉其心意妄想不生便得解脫
何必不見欲使不生如彼飲水愚人等無有
異

見他塗舍喻

三十九

釋一

昔有一人往至他舍見他屋舍牆壁塗治其
地平正清淨甚好便問之言用何和泥得如
見好主人答言用稻穀麩水浸令熟和塗泥
壁故得如是愚人即便而作念言若純以稻
麩不如合稻而用作之壁可白淨泥治平好

二十

使用稻穀和泥用塗其壁望得平正反更高
下壁都圯裂虛棄稻穀都無利益不如惠施
可得功德凡夫之人亦復如是聞聖人說法
修行諸善捨此身已可得生天及以解脫便
自殺身望得生天及以解脫徒自虛喪空無
可獲如彼愚人

治禿喻

四十

昔有一人頭上無毛冬則大寒夏則患熱兼
爲蚊蚋之所咬食晝夜受惱甚以爲苦有一
醫師多諸方術時彼禿人往至其所語其醫

言唯願大師爲我治之時彼醫師亦復頭禿
即便脫帽示之而語之言我亦患之以爲痛
苦若令我治能得差者應先自治以除其患
世間之人亦復如是爲生老病死之所侵惱
欲求長生不死之處聞有沙門婆羅門等世
之良醫善療衆患便往其所而語之言唯願
爲我除去無常生死之患常處安樂長存不
變時婆羅門等即便報言我亦患此無常生
老病死種種求見長存之處終不能得今我
若能使汝得者我亦應先自得今汝亦得如

彼患禿之人徒自疲勞不能得差

毗舍闍鬼喻

四十一

昔有二毗舍闍鬼共有一篋一杖一履二鬼
共諍各欲得二鬼紛紜竟日不能使平時有
一人來見之已而問之言此篋杖履有何奇
異汝等共諍瞋忿乃爾二鬼答言我此篋者
能出一切衣服飲食牀褥卧具資生之物盡
從中出執此杖者怨敵歸伏無敢與諍著此
履者能令人飛行無罣礙此人聞已即語鬼
言汝等小遠我當爲汝平等分之鬼聞其語

尋即遠避此人即時抱籬捉杖躡屐而飛二鬼愕然竟無所得人語鬼言爾等所諍我已得去今使爾等更無所諍毗舍闍者喻於衆魔及以外道布施如篋人天五道資用之具皆從中出禪定如杖銷伏魔怨煩惱之賊侍戒如殺必昇人天諸魔外道諍篋者喻於有漏中強求果報空無所得若能修行善行及以布施持戒禪定便得離苦獲得道果

估客駝死喻

四十二

譬如估客遊行商賈會於路中而駝卒死駝

上所載多有珍寶細軟上氈種種雜物駝既死已即剥其皮商主捨行坐二子弟而語之言好看駝皮莫使濕爛其後天雨二人頑癡盡以好氈覆此皮上氈盡濕爛皮氈之價理自懸殊以愚癡故以氈覆皮世間之人亦復如是其不殺者喻於白氈其駝皮者即喻財貨天雨濕爛喻於放逸敗壞善行不殺戒者即佛法身最上妙因然不能修但以財貨造諸塔廟供養衆僧捨根取末不求其本漂浪五道莫能自出是故行者應當精心持不殺

詳一

廿二

戒

磨大石喻 四十三

譬如有人磨一大石勤加功力經歷日月作小戲牛用功既重所期甚輕世間之人亦復如是磨大石者喻於學問精勤勞苦作小牛者喻於名聞互相是非夫爲學者研思精微博通多識宜應履行遠求勝果方求名譽憍慢貢高增長過患

食半餅喻 四十四

譬如有人因其飢放食七枚煎餅食六枚半

已便得飽滿其人悲悔以手自打而作是言我今飽足由此半餅然前六餅唐自捐棄設如半餅能充足者應先食之世間之人亦復如是從本以來常無有樂然其癡倒橫生樂想如彼癡人於半番餅生於飽想世人無知以富貴爲樂夫富貴者求時甚苦廿三既獲得已守護亦苦後還失之憂念復苦於三時中都無有樂猶如衣食遮故名樂於辛苦中橫生樂想諸佛說言三界無安皆是大苦凡夫倒惑橫生樂想

奴守門喻 四十五

譬如有人將欲遠行勅其奴言爾好守門并看驢索其主行後時隣里家有作樂者此奴欲聽不能自安尋以索繫門置於驢上負至戲處聽其作樂奴去之後舍中財物賊盡持去大家行還問其奴言財寶所在奴便答言大家先付門驢及索自是以外非奴所知大家復言留爾守門正爲財物財物旣失用於門爲生死愚人爲愛奴僕亦復如是如來教誡常護根門莫著六塵守無明驢看於愛索

而諸比丘不奉佛教貪求利養詐現清白靜處而坐心意流馳貪著五欲爲色聲香味之所惑亂無明覆心愛索纏縛正念覺意道品財寶悉皆散失

偷犂牛喻 四十六

譬如一村共偷犂牛而共食之其失牛者逐跡至村喚此村人問其由狀而語之言爾在此村不偷者對曰我實無村又問爾村中有池在此池邊共食牛不答言無池又問池傍有樹不對言無樹又問偷牛之時在爾村東

不對曰無東又問當爾偷牛非日中時耶對
曰無中又問從何無村及以無樹何有天下
無東無時知爾妄語都不可信爾偷牛食不
對言實食破戒之人亦復如是覆藏罪過不
肯發露死入地獄諸天善神以天眼觀不得

覆藏如彼食牛不得欺抵

呼一

升四

貧人能作鴛鴦鳴喻

四十七

昔外國法節慶之日一切婦女盡持優鉢羅
華以為鬘飾有一貧人其婦語言爾若能得
優鉢羅華來用與我為爾作妻若不能得我

捨爾去其夫先來常苦能作鴛鴦之鳴即入
王池作鴛鴦鳴偷優鉢羅華時守池者而作
是問池中者誰而此貧人失口答言我是鴛
鴦守者捉得將詣王所而於道中復更和聲
作鴛鴦鳴守池者言爾先不作今作何益世
間愚人亦復如是終身殘害作諸惡業不習
心行使令調善臨命終時方言今我欲得修
善獄卒將去付閻羅王雖欲修善亦無所及
已如彼愚人欲到王所作鴛鴦鳴
野干為折樹枝所打喻

四十八

譬如野干在於樹下風吹枝折墮其脊上即
便閉目不欲看樹捨棄而走到于露地乃至
日暮亦不肯來遙見風吹大樹枝柯動搖上
下便言喚我尋來樹下愚癡弟子亦復如是
已得出家得近師長以小訶責即便逃走復
於後時遇惡知識惱亂不已方還師所如是
去來是爲愚惑

小兒爭分別毛喻

四十九

昔日有二小兒入河遨戲於此水底得一把
毛一小兒言此是仙鬚一小兒言此罷毛爾

永樂北藏

百喻經

時河邊有一仙人此二小兒諍之不已詣彼
仙所決其所疑而彼仙人尋即取米及胡麻
子口中含嚼吐著掌中語小兒言我掌中者
似孔雀屎而此仙人不答他問人皆知之世
間愚人亦復如是說法之時戲論諸法不答
正理如彼仙人不答所問爲一切人之所嗤
笑浮漫虛說亦復如是

醫治脊僂喻

五十

譬如有人卒患脊僂請醫療治醫以酥塗上
下著板用力痛壓不覺雙目一時併出世間

第一三〇冊

愚人亦復如是爲修福故治生估販作諸非法其事雖成利不補害將來之世入於地獄喻雙目出

百喻經卷上

一

廿六

音釋

[illegible]

音希虛歎悲倩七政切
咽而抽息也借使人也
餽餽於偽切
夔之

百喻經卷下

蕭齊天竺三藏求那毗地譯

群二

五人買婢共使喻 伎人作樂喻 師患脚
 付二弟子喻 蛇頭尾共爭在前喻 願為
 王剃鬚喻 索無物喻 蹋長者口喻 二
 子分財喻 觀作瓶喻 見水底金影喻
 梵天弟子造物喻 病人食雉肉喻 伎人
 著戲羅刹服共相驚怖喻 人謂故屋中有
 惡鬼喻 五百歡喜丸喻 長者共商人入
 海採寶喻 夫婦食餅共為要喻 共相怨

害喻 效其祖先急速食喻 嘗菴婆羅果
 喻 為二婦故喪其兩目喻 啞米決口喻
 詐言馬死喻 出家凡夫貪利養喻 駝
 甕俱失喻 田夫思願王女喻 捋驢乳喻
 與兒期早行喻 為王負机喻 倒灌喻
 為羆所齧喻 以種田喻 獼猴喻 月
 蝕打狗喻 女婦患眼痛喻 父取兒耳璫
 喻 劫盜分財喻 獼猴把豆喻 得金鼠
 狼喻 地得金錢喻 貧人欲與富者等物
 喻 小兒得歡喜丸喻 老母捉羆喻 摩

尼水竇喻 二 鴿喻 詐稱眼盲喻 惡賊

所劫失鬘喻 小兒得大龜喻

五人買婢共使喻 一

譬如五人共買一婢其中一人語此婢言與
我浣衣次有一人復語浣衣婢語次者先與

其浣後者恚曰我共前人同買於汝云何獨
爾即鞭十下如是五人各打十下五陰亦爾
煩惱因緣合成此身而此五陰恒以生老病
死無量苦惱榜笞衆生

伎人作樂喻 二

譬如伎人王前作樂王許千錢後從王索王
不與之王語之言汝向作樂空樂我耳我與
汝錢亦樂汝耳世間果報亦復如是人中天
上雖受少樂亦無有實無常敗滅不得久住
如彼空樂

師患脚付二弟子喻 三

群二

二

譬如一師有二弟子其師患脚遣二弟子人
當一脚隨時按摩其二弟子常相憎嫉一弟
子行其一弟子捉其所當按摩之脚以石打
折彼既來已忿其如是復捉其所按之脚

尋復打折佛法學徒亦復如是方等學者非
斥小乘小乘學者復非方等故使大聖法典
二途兼忘

蛇頭尾共爭在前喻

四

譬如有蛇尾語頭言我應在前頭語尾言我
恒在前何以卒爾頭果在前其尾纏樹不能
得去放尾在前即墮火坑燒爛而死師徒弟
子亦復如是言師耆老每恒在前我諸年少
應爲導首如是年少不閑戒律多有所犯因
即相牽入於地獄

願爲王剃鬚喻

五

昔者有王有一親信於軍陣中歿命救王使
得安全王大歡喜與其所願即便問言汝何
所求恣汝所欲臣便答言王剃鬚時願聽我
剝王言此事若適汝意聽汝所願如此愚人
世人所笑半國之治大臣輔相悉皆可得乃
求賤業愚人亦爾諸佛於無量劫難行苦行
自致成佛若得遇佛及值遺法人身難得譬
如盲龜值浮木孔此二難值今已遭遇然其
意劣奉持少戒便已爲足不求涅槃勝妙法

群二

三

也無心進求自行邪事便已爲足

索無物喻^六

昔有二人道中共行見有一人將故麻車在
嶮路中不能得前時將車者語彼二人佐我
推車出此嶮路二人答言與我何物將車者
言無物與汝時此二人即佐推車至於平地
語將車人言與我物來答言無物又復語言
與我無物二人之中其一人者含笑而言彼
不肯與何足爲愁其人答言與我無物必應
有無物其一人言無物者二字共合是爲假

名世俗凡夫著無物者便生無所有處其二
人言無物者即是無相無願無作

蹋長者口喻^七

昔有大富長者左右之人欲取其意皆盡恭
敬長者唾時左右之人以脚踏却有一愚者
不爲得蹋而作是言若唾地者諸人蹋却欲
唾之時我當先蹋於是長者正欲咳唾時此
愚人即便舉脚踏蹋長者口破脣折齒長者語
愚人言汝何以故蹋我脣口愚人答言若長
者唾出口落地左右諂者已得蹋去我雖欲

蹋每常不及以是之故唾欲出口舉脚先蹋
望得汝意凡物須時時未及到雖設功力反
得苦惱以是之故世人當知時與非時

二子分財喻八

昔摩羅國有一刹利得病極重必知定死誠

釋二

勅二子我死之後善分財物二子隨教於其
死後分作二分兄言弟分不平爾時有一野
老人言教汝分物使得平等現所有物破作
二分云何破之所謂衣裳中割作二分盤瓶
亦復中破作二分所有瓮瓿亦破作二分錢

亦破作二分如是一切所有財物盡皆破之
而作二分如是分物人所嗤笑如諸外道偏
修分別論門有四種有決定答論門譬如人
一切有皆死此是決定答死者必有生是應
分別答愛盡者無生有愛必有生是名分別
答論門有問人爲最勝不應反問言汝問三
惡道爲問諸天若問三惡道人實爲最勝若
問於諸天人必爲不如如是等義名反問答
論門若問十四難若問世界及衆生有邊無
邊有終始無終始如是等義名置答論門諸

外道愚癡自以為智慧破於四種論作一分別論喻如愚人分錢物破錢為兩段

觀作瓶喻九

譬如二人至陶師所觀其蹋輪而作瓦瓶看無厭足一人捨去往至大會極得美饌又獲珍寶期二一人觀瓶而作是言待我看訖如是漸五冉乃至日沒觀瓶不已失於衣食愚人亦爾修理家務不覺非常

今日營此事 明日造彼業 諸佛大龍出 雷音遍世間 法雨無障礙 緣事故不聞

不知死卒至 失此諸佛會 不得法珍寶

常處惡道窮 背棄於正法 彼觀緣事瓶

終當無竟已 是故失法利 永無解脫時

見水底金影喻十

昔有癡人往大池所見水底影有真金像謂呼有金即入水中撓泥求覓疲極不得還出復坐須臾水清復現金色復更入裏撓泥更求覓亦復不得其父覓子得來見子而問子言汝何所作疲困如是子白父言水底有真金我時投水欲撓泥取疲極不得父看水底

真金之影而知此金在於樹上所以知之影
現水底其父言曰必飛鳥銜金著於樹上即
隨父語上樹求得

凡夫愚癡人 無智亦如是 於無我陰中
橫生有我想 如彼見金影 勤苦而求覓

徒勞無所得

梵天弟子造物喻 十二

婆羅門眾皆言大梵天王是世間父能造萬
物造萬物主者有弟子言我亦能造萬物實
是愚癡自謂有智語梵天言我欲造萬物梵

天王語言莫作此意汝不能造不用天語便
欲造物梵天見其弟子所造之物即語之言

汝作頭大大作項極小作手大大作臂極小
作脚極小作踵極大如似毗舍闍鬼以此義
當知各各自業所造非梵天能造諸佛說法

不著二邊亦不著斷亦不著常如似八正道

說法諸外道見是斷常事已便生執著欺誑
世間作法形像所說實是非法

病人食雉肉喻 十二

昔有一人病患委篤良醫占之云須恒食一

種雉肉可得愈病而此病者市得一雉食之已盡更不復食醫於後時見便問之汝病愈未病者答言醫先教我恒食雉肉是故今者食一雉已盡更不敢食醫復語言若前雉已盡何不更食汝今云何止食一雉望得愈病一切外道亦復如是聞佛菩薩無上良醫說言當解心識外道等執於常見便爲過去未來現在唯是一識無有遷謝猶食一雉是故不能療其愚惑煩惱之病大智諸佛教諸外道除其常見一切諸法念念生滅何有一識

常恒不變如彼世醫教更食雉而得病愈佛亦如是教諸衆生令得解諸法壞故不常續故不斷即得滅除常見之病

伎人著戲羅刹服共相驚怖喻

十三

昔乾陀衛國有諸伎人因時飢餒遂食他土經婆羅新山而此山中素饒惡鬼七食人羅刹時諸伎人會宿山中山中風寒然火而卧伎人之中有患寒者著彼戲衣羅刹之服向火而坐時行伴中從睡寤者卒見火邊有一羅刹竟不諦觀捨之而走遂相驚動一切伴侶

悉皆逃奔時彼伴中著羅刹衣者亦復尋逐
奔馳絕走諸同行者見其在後謂欲加害倍
增惶怖越度山河投赴溝壑身體傷破疲極
委頓乃至天明方知非鬼一切凡夫亦復如
是處於煩惱飢儉善法而欲遠求常樂我淨
無上法食便於五陰之中橫計於我以我見
故流馳生死煩惱所逐不得自在墜墮三途
惡趣溝壑至天明者喻生死盡智慧明曉
方知五陰無有真我
人謂故屋中有惡鬼喻 十四

昔有故屋人謂此室常有惡鬼皆悉怖畏不
敢寢息時有一人自謂大膽而作是言我欲
入此室中寄卧一宿即入宿止後有一人自
謂膽勇勝於前人復聞傍人言此室中恒有
惡鬼即欲入中排門將前時先入者謂其是
鬼即復推門遮不聽前在後來者復謂有鬼
二人鬪諍遂至天明既相覩已方知非鬼一
切世人亦復如是因緣暫會無有宰主一一
推析誰是我者然諸衆生橫計是非強生諍
訟如彼二人等無差別

五百歡喜丸喻^{十五}

昔有一婦荒淫無度欲情既盛嫉惡其夫每思方策頻欲殘害種種設計不得其便會值其夫聘使隣國婦密爲計造毒藥丸欲用害夫詐語夫言爾今遠使慮有乏短今我造作碎二五百歡喜丸用爲資糧以送於爾爾若出國至他境界飢困之時乃可取食夫用其言至他界已未及食之於夜闇中止宿林間畏懼惡獸上樹避之其歡喜丸忘置樹下即以其夜值五百偷賊盜彼國王五百疋馬并及寶

物來止樹下由其逃突盡皆飢渴於其樹下見歡喜丸諸賊取已各食一丸藥毒氣盛五百群賊一時俱死時樹上人至天明已見此群賊死在樹下詐以刀箭斫射死屍收其鞍馬并及財寶驅向彼國時彼國王多將人衆鞍乘來逐會於中路值於彼王彼王問言爾是何人何處得馬其人答言我是某國人而於道路值此群賊共相斫射五百群賊今皆一處死在樹下由是之故我得此馬及以珍寶來投王國若不見信可遣往看賊之瘡痕

殺害處所王時即遣親信往看果如其言王時欣然歎未曾有既還國已厚加爵賞大賜珍寶封以聚落彼王舊臣咸生嫉妬而白王言彼是遠人未可服信如何卒爾寵遇過厚至於爵賞踰越舊臣遠人聞已而作是言誰有勇健能共我試請於平原校其技能舊人愕然無敢敵者後時彼國大曠野中有惡師子截道殺人斷絕王路時彼舊臣詳共議之彼遠人者自謂勇健無能敵者今復若能殺彼師子為國除害真為奇特作是議已便白

於王王聞是已給賜刀仗尋即遣之爾時遠人既受勅已堅強其意向師子所師子見之奮激鳴吼騰躍而前遠人驚怖即便上樹師子張口仰頭向樹其人怖急失所捉刀值師子口師子尋死爾時遠人歡喜踴躍來白於王王倍寵遇時彼國人率爾敬伏咸皆讚歎其婦人歡喜尤者喻不淨施王遣使者喻善知識至他國者喻於諸天殺群賊者喻得須陀洹強斷五欲并諸煩惱遇彼國王者喻遭值賢聖國舊人等生嫉妬者喻諸外道見有

智者能斷煩惱及以五欲便生誹謗言無此事遠人激厲而言舊臣無能與我共爲敵者喻於外道無敢抗衝殺師子者喻破惡魔既斷煩惱又伏惡魔便得無著道果封賞每常怖怯者喻能以弱而制於強其施初時雖無淨心然彼其施遇善知識便獲勝報不淨之施猶尚如此況復善心歡喜布施是故應當於福田所勤心修施

長者共商人入海採寶喻

十六

昔有大長者子共諸商人入海採寶此長者

子善誦入海捉船方法若入海水漩洑洄流磯激之處當如是捉如是正如是住語衆人言入海方法我悉知之衆人聞已深信其語既至海中未經幾時船師遇病忽然便死時長者子即便代處至洄洑駛流之中唱言當如是捉如是正船槳迴旋轉不能前進至於實所舉船商人沒水而死凡夫之人亦復如是少習禪法安般數息及不淨觀雖誦其文不解其義種種方法實無所曉自言善解妄授禪法使前人迷亂失心倒錯法相終年累

律二

十

歲空無所獲如彼愚人使他沒海

夫婦食餅共爲要喻^{十七}

昔者夫婦有三番餅夫婦共分各食一餅餘一番在共作要言若有語者要不與餅旣作要已爲一餅故各不敢語須更有賊入家偷盜取其財物一切所有盡畢賊首夫婦二人以先要故眼看不語賊見不語即其夫前侵畧其婦其夫眼見亦復不語婦便喚賊語其夫言云何癡人爲一餅故見賊不喚其夫拍手笑言咄婢我定得餅不復與你世人聞之

無不嗤笑凡夫之人亦復如是爲小名利故詐現靜默爲虛假煩惱種種惡賊之所侵畧喪其善法墜墮三塗都不怖畏求出世道方於五欲耽著嬉戲雖遭大苦不以爲患如彼愚人等無有異

共相怨害喻

^{十八}

十一

昔有一人共他相瞋愁憂不樂有人問言汝今何故愁悴如是即答之言有人毀我力不能報不知何方可得報之是以愁耳有人語言唯有毗陀羅呪可以害彼但有一患未及

害彼反自害已其人聞已便大歡喜願但教我雖當自害要望傷彼世間之人亦復如是爲瞋恚故欲求毗陀羅呪用惱於彼竟未害他先爲瞋恚反自惱害墮於地獄畜生餓鬼如彼愚人等無差別

效其祖先急速食喻

十九

昔有一人從北天竺至南天竺住止既久即聘其女共爲夫婦時婦爲夫造設飲食夫得急吞不避其熱婦時怪之語其夫言此中無賊劫奪人者有何急事忽忽乃爾不安徐食

夫答婦言有好密事不得語爾婦聞其言謂有異法慙慙問之良久乃答我祖父已來法常速食我今效之是故疾耳世間凡夫亦復如是不達正理不知善惡作諸邪行不以爲恥而天我父祖已來作如是法至死受行終

不捨離如彼愚人習其速食以爲好法

嘗菴婆羅果喻

二十

昔有一長者遣人持錢至他園中買菴婆羅果而欲食之而勅之言好甜美者汝當買來即便持錢往買其果果主言我此樹果悉皆

美好無一惡者汝嘗一果足以知之買果者
言我今當一一嘗之然後當取若但嘗一何
以可知尋即取果一一皆嘗持來歸家長者
見已惡而不食便一切都棄世間之人亦復
如是聞持戒施得大富樂身常安隱無有諸
患不肯信之便作是言布施得富我自得時
群二
然後可信目覩現世貴賤貧窮皆是先業所
獲果報不知推一以求因果方懷不信須已
自經一旦命終財物喪失如彼嘗果一切都
棄

為二婦故喪其兩目喻 二十一

昔有一人聘取二婦若近其一為一所瞋不
能裁斷便在二婦中間正身仰卧值天大雨
屋舍淋漏水土俱下墮其眼中以先有要不
敢起避遂令二目俱失其明世間凡夫亦復
如是親近邪友習行非法造作結業墮三惡
道長處生死喪智慧眼如彼愚夫為其二婦
故二眼俱失

噉米決口喻 二十二

昔有一人至婦家舍見其擣米便往其所偷

米噉之婦來見夫欲共其語滿口中米都不
怎和羞其婦故不肯棄之是以不語婦怪不
語以手摸看謂其口腫語其父言我夫始來
卒得口腫都不能語其父即便喚醫治之時
醫言曰此病最重以刀決之可得差耳即便
以刀決破其口米從中出其事彰露世間之
人亦復如是作諸惡行犯於淨戒覆藏其過
不肯發露墮於地獄畜生餓鬼如彼愚人以
小羞故不肯吐米以刀決口乃顯其過
詐言馬死喻 二十三

昔有一人騎一黑馬入陣擊賊以其怖故不
能戰鬪便以血汙塗其面目詐現死相卧死
人中其所乘馬爲他所奪軍衆既去便欲還
家即截他人白馬尾來既到舍已有人問言
汝所乘馬今爲所在何以不乘答言我馬已
死遂持尾來傍人語言汝馬本黑尾何以白
默然無對爲人所笑世間之人亦復如是自
言善好修行慈心不食酒肉然殺害衆生加
諸楚毒妄自稱善無惡不造如彼愚人詐言
馬死

出家凡夫貪利養喻

二十四

昔有國王設於教法諸有婆羅門等在我國
內制抑洗淨不洗淨者驅令策使種種苦役
有婆羅門空捉澡罐詐言洗淨人爲著水即
便瀉棄便作是言我不洗淨王自洗之爲正
意故用避王役妄言洗淨實不洗之出家凡
夫亦復如是剃頭染衣內實毀禁詐現持戒
望人利養復避王役外似沙門內實虛欺如
捉空瓶但有外相
駝甕俱失喻

二十五

昔有一人先甕中盛穀駱駝入頭甕中食穀

後不得出旣不得出以爲憂惱有一老人來
語之言汝莫愁也我教汝出汝用我語必得
速出汝當斬頭自得出之即用其語以刀斬
頭旣復殺駝而復破甕如此癡人世人所笑
凡夫愚人亦復如是希心菩提志求三乘宜
持禁戒護防諸惡然爲五欲毀破淨戒旣犯
禁已捨離三乘縱心極意無惡不造乘及淨
戒二俱捐捨如彼愚人駝甕俱失
田夫思願王女喻

二十六

昔有田夫遊行城邑見國王女顏貌端正世
所希有晝夜想念情不能已思與交通無由
可遂顏色瘵黃即成重病諸所親見便問其
人何故如是答親里言我昨見王女顏貌端
正思與交遊不能得故是以病耳我若不得
必死無疑諸親語言我當為汝作好方便使
汝得之勿待愁也後日見之便語之言我等
為汝便為是得唯王女不欲田夫聞之欣然
而笑謂呼必得世間愚人亦復如是不別時
節春秋冬夏便於冬時擲種土中望得果實

徒喪其功空無所獲芽莖枝葉一切都失世
間愚人修習少福謂為具足便謂善根已可
證得如彼田夫希望王女

捋驢乳喻 二十七

昔邊國人不識於驢聞他說言驢乳甚美都

無識者爾時諸人得一駝驢欲捋其乳十五諍共

捋之其中有捋頭者有捋耳者有捋尾者有
捋脚者復有捋器者各欲先得於前飲之中
捋驢根謂呼是乳即便捋之望得其乳眾人
疲厭都無所得徒自勞苦空無所獲為一切

世人之所嗤笑外道凡夫亦復如是聞說於道不應求處妄生想念起種種邪見裸形自餓投巖赴火以是邪見墮於惡道如彼愚人妄求於乳

與兒期早行喻 二十八

昔有一人夜語兒言明當共汝至彼聚落有所取索兒聞語已至明清旦竟不問父獨往詣彼既至彼已身體疲極空無所獲又不得食飢渴欲死尋復迴還求見其父父見子來深責之言汝大愚癡無有智慧何不待我空

自往來徒受其苦爲一切世人之所嗤笑凡夫之人亦復如是設得出家即剃鬚髮服三法衣不求明師諮受道法失諸禪定道品功德沙門妙果一切都失如彼愚人虛作往返徒自疲勞形似沙門實無所得

爲王負机喻 二十九

昔有一王欲入無憂園中歡娛受樂勅一臣言汝捉一机持至彼園我用坐息時彼使人羞不肯捉而白王言我不能捉我願擔之時王便以三十六机置其背上驅使擔之至於

園中如是愚人爲世所笑凡夫之人亦復如是若見女人一髮在地自言持戒不肯捉之後爲煩惱所惑三十六物髮毛爪齒屎尿不淨不以為醜三十六物一時都捉不生慚羞至死不捨如彼愚人擔負於机

倒灌喻

三十

釋二

十六

昔有一人患下部病醫言當須倒灌乃可瘥耳便集灌具欲以灌之醫未至頃便取服之腹脹欲死不能自勝醫既來至怪其所以即便問之何故如是即答醫言向時灌藥我取

服之是故欲死醫聞是語深責之言汝大愚人不解方便即更以餘藥服之方得吐下爾乃得瘥如此愚人爲世所笑凡夫之人亦復如是欲修學禪觀種種方法應觀不淨反觀數息應數息者反觀六界顛倒上下無有根本徒喪身命爲其所困不諮良師顛倒禪法如彼愚人飲服不淨爲羆所齧喻

三十一

昔有父子與伴共行其子入林爲羆所齧爪壞身體困急出林還至伴邊父見其子身體

傷壞怪問之言汝今何故被此瘡害子報父
言有一種物身毛耽毳來毀害我父執弓箭
往到林間見一仙人毛髮深長便欲射之傍
人語言何故射之此人無害當治有過世間
愚人亦復如是為彼雖著法服無道行者之
所罵辱而濫害良善有德之人喻如彼父十七羅
傷其子而枉加神仙

以種田喻

三十二

昔有野人來至田里見好麥苗生長鬱茂問
麥主言云何能令是麥茂好其主答言平治

其地兼加糞水故得如是彼人即便依法用
之即以水糞調和其田下種於地畏其自脚
蹈地令堅其麥不生我當坐一牀上使人舉
之於上散種爾乃好耳即使四人人擎一脚
至田散種地堅逾甚為人嗤笑恐以二足更
增八足凡夫之人亦復如是既修戒田善芽
將生應當師諮受行教誡令法芽生而反違
犯多作諸惡便使戒芽不生喻如彼人畏其
二足倒加其八

獼猴喻

三十三

昔有一獼猴爲大人所打不能柰何反怨小兒凡夫愚人亦復如是先所瞋人代謝不停滅在過去及於相續後生之法謂是前者妄生瞋忿毒恚彌深如彼癡猴爲大人所打反瞋小兒

月蝕打狗喻

三十四

昔阿修羅王見日月明淨以手障之無智常人狗無罪咎橫加於惡凡夫亦爾貪瞋愚癡橫苦其身卧棘刺上五熱炙身如彼月蝕枉橫打狗

女婦患眼痛喻

三十五

昔有一女人極患眼痛有知識女人問言汝眼痛耶答言眼痛彼女復言有眼必痛我雖眼未痛並欲挑眼恐其後痛傍人語言眼若在者或痛不痛眼若無者終身長痛凡愚之人亦復如是聞富貴者衰患之本畏不布施明二恐後得報財物殷溢重受苦惱有人語言汝若施者或苦或樂若不施者貧窮大苦如彼女人不忍近痛便欲去眼乃爲長痛

父取兒耳璫喻

三十六

昔有父子二人緣事共行路賊卒起欲來剝之其兒耳中有真金璫其父見賊卒發畏失耳璫即便以手挽之耳不時決爲耳璫故便斬兒頭須臾之間賊便棄去還以兒頭著於肩上不可平復如是愚人爲世間所笑凡夫之人亦復如是爲名利故造作戲論言無二世有二世無中陰有中陰無心數法有心數法無種種妄想不得法實他人以如法論破其所說便言我論中都無是說如是愚人爲小名利便故妄語喪沙門道果身壞命終墮

三惡道如彼愚人爲少利故斬其兒頭

劫盜分財喻

三十七

昔有群賊共行劫盜多取財物即共分之等以爲分唯有鹿野欽婆羅色不純好以爲下分與最劣者下劣者得之恚恨謂呼大失至城賣之諸貴長者多與其價一人所得倍於衆伴方乃歡喜勇悅無量猶如世人不知布施有報無報而行少施得生天上受無量樂方更悔恨悔不廣施如欽婆羅後得大價乃生歡喜施亦如是少作多得爾乃自慶恨不

群二

十九

益爲

獼猴把豆喻

三十八

昔有一獼猴持一把豆誤落一豆在地便捨
手中豆欲覓其一未得一豆先所捨者雞鴨
食盡凡夫出家亦復如是初毀一戒而不能
悔已不悔故放逸滋蔓一切都捨如彼獼猴
失其一豆一切都棄

得金鼠狼喻

三十九

昔有一人在路而行道中得一金鼠狼心生
喜踊持置懷中涉道而進至水欲渡脫衣置

地尋時金鼠變爲毒蛇此人深思寧爲毒蛇
螫殺要當懷去心至冥感還化爲金傍邊愚
人見其毒蛇變成真實謂爲恒爾復取毒蛇
內著懷裏卽爲毒蛇之所螫螫喪身殞命世
間愚人亦復如是見善獲利內無真心但爲
利養來附於法命終之後隨在惡處如捉毒
蛇被螫而死

地得金錢喻

四

昔有貧人在路而行道中偶得一囊金錢心
大喜踊即便數之數未能周金主忽至盡還

奪錢其人當時悔不疾去懊恨之情甚為極
苦遇佛法者亦復如是雖得值遇三寶福田
不勤方便修行善業忽爾命終墮三惡道如
彼愚人還為其主奪錢而去如偈所說

今日營此業

解二

明日造彼事

二十樂著不觀苦

不覺死賊至

忽忽營眾務

凡人無不爾

如彼數金錢

其事亦如是

貧人欲與富者等財物喻

四十一

昔有一貧人有少財物見大富者意欲共等
不能等故雖有少財欲棄水中傍人語言此

物雖少可得延君性命數日何故捨棄擲著

水中世間愚人亦復如是雖復出家少得利

養心有希望常懷不足不能得與高德者等

獲其利養見他宿舊有德之人素有多聞多

眾供養意欲等之不能等故心懷憂苦便欲

罷道如彼愚人欲等富者自棄已財

小兒得歡喜丸喻

四十二

昔有一乳母抱兒涉路行道疲極睡眠不覺

時有一人持歡喜丸授與小兒小兒得已貪

其美味不顧身物此人即時解其鉗鎖瓔珞

衣物都盡持去比丘亦爾樂在衆務憤鬧之處貪少利養爲煩惱賊奪其功德戒寶瓔珞如彼小兒貪少味故一切所有賊盡持去

老母捉羆喻

四十三

昔有一老母在樹下卧羆欲來搏爾時老母

群二

繞樹走避羆尋後逐一手抱樹欲捉老母老

群一

母得急即時合樹捺羆兩手羆不能動便有異人來至其所老母語言汝共我捉殺分其肉時彼人者信老母語即時共捉既捉之已老母即便捨羆而走其人於後爲羆所困如

是愚人爲世所笑凡夫之人亦復如是作諸異論既不善好文辭繁重多有諸病竟不成訖便捨終亡後人捉之欲爲解釋不達其意反爲其困如彼愚人代他捉羆反自被害

摩尼水竇喻

四十四

昔有一人與他婦通交通未竟夫從外來即便覺之住於門外伺其出時便欲殺害婦語人言我夫已覺更無出處唯有摩尼可以得出胡以水竇名爲摩尼欲令其人從水竇出其人錯解謂摩尼珠所在求覓而不知處即

作是言不見摩尼珠我終不云須臾之間爲其所殺凡夫之人亦復如是有人語言生死之中無常苦空無我離斷常二邊處於中道於此中過可得解脫凡夫錯解便求世界有邊無邊及以衆生有我無我竟不能觀中道之理忽然命終爲於無常之所殺害墮三惡道如彼愚人推求摩尼爲他所害

二鴿喻

四十五

昔有雄雌二鴿共同一巢秋果熟時取果滿巢於其後時果乾減少唯半巢在雄瞋雌言

取果勤苦汝獨食之唯有半在雌鴿答言我不獨食果自減少雄鴿不信瞋恚而言非汝獨食何由減少即便以嘴啄雌鴿殺未經幾日天降大雨果得濕潤還復如故雄鴿見已方生悔恨彼實不食我妄殺他即悲鳴命喚雌鴿汝何處去卅二凡夫之人亦復如是顛倒在懷妄取欲樂不觀無常犯於重禁悔之於後將何所及後雖悲歎如彼愚鴿

詐稱眼盲喻

四十六

昔有工匠師爲王作務不堪其苦詐言眼盲

便得脫苦有餘作師聞之便欲自壞其目用
避苦役有人語言汝何以自毀徒受其苦如
是愚人爲世人所笑凡夫之人亦復如是爲
少名譽及以利養使故妄語毀壞淨戒身死
命終墮三惡道如彼愚人爲少利故自壞其

目

爲惡賊所劫失氎喻

四十七

昔有二人爲伴共行曠野一人披一領氎中
路爲賊所剥一人逃避走入草中其失氎者
先於氎頭裹一金錢便語賊言此衣適可直

一枚金錢我今求以一枚金錢而用贖之賊
言金錢今在何處即便氎頭解取示之而語
賊言此是真金若不信我語今此草中有好
金師可往問之賊既見已復取其衣如是愚
人氎與金錢一切都失自失其利復使彼失
凡夫之人亦復如是修行道品作諸功德爲
煩惱賊之所劫掠失其善法喪諸功德不但
自失其利復使餘人失其道業身壞命終墮
三惡道如彼愚人彼此俱失

小兒得大龜喻

四十八

昔有一小兒陸地遊戲得一大龜意欲殺之
不知方便而問人言云何得殺有人語言汝
但擲置水中即時可殺爾時小兒信其語故
即擲水中龜得水已即便走去凡夫之人亦
復如是欲守護六根修諸功德不解方便而
問人言作何因緣而得解脫邪見外道天魔
波旬及惡知識而語之言汝但極意六塵恣
情五欲如我語者必得解脫如是愚人不諦
思惟使用其語身壞命終墮三惡道如彼小
兒擲龜水中

此論我所造	和合喜笑語	多損正實說
觀義應不應	如似苦毒藥	和合爲石蜜
藥爲破壞病	此論亦如是	正法中戲笑
譬如彼狂藥	佛正法寂定	明照於世間
如服吐下藥	以酥潤體中	我今以此義
顯發於寂定	如阿伽陀藥	樹葉而裹之
取藥塗毒竟	樹葉還棄之	戲笑如藥裹
實義在其中	智者取正義	戲笑便應棄
尊者僧伽斯那造作癡華鬘竟		

百喻經卷下

音釋

搏

搏郎括切手

蝕

音食

榜

榜蒲切

咎

咎超之切

擊

也

瓮

瓮蒲切

奔

奔切

去

也

漩

漩房切

旬

旬宣切

湫

湫切

也

模

莫音

腫

之

龍

疥

疥依

據

切

氣

也

駸

駸扶

兩

切

也

瘥

瘥病

除也

毳

蘇含

切

貌

帶二

荷